

ጳውሎስ ተሰሎንቄ መረሃ ከተሶ ሶህኑት ኣጉስ

መሲህ ፈንቀል አሜትሰ አሌን ኬኦ ጠዕምቱት ብተተ ኬሰን መርቤቹሃ ተሰሎንቄ አመዕናኖ በላን ኬኦ ኦርሸት ባሰን መርቶኡ፤ ጳውሎስ ተሰሎንቄ መረሃ ከተሶ ለምቅ ሶህኑት «ቀርቼ ፈንቀል አሜተኖ በሩ ሆንጠኮኡ» የኖ ጠዋን ሰመቼሃ እቅ፤ ጳውሎስ መሲህ ፈንቀል አሜቱሰ ሄጭ «ሾክ መንቼ» ዬኖ መሲህ ግበኖሁ አዋንሰን ኣዲንያ አሌን ሂሉለክ ሾኩ ጠዉ በተኣን መረኖ የን እሰ አመዕነቱ መክሶተ ዋብ የኖ።

ሶቀማንቹሰ እነበባእሩ ኦርሸት በተኦ ጎሬሁ አመዕነቶንከሰ ጠረኝቶተ እሰለክ ዋሉ ሆጉተ ሀዕልታሰሩ አታ ደኒን ሄኢሀሰ ደግለለኖርቹ ደእቶተ ጠረኝት አቶተ ህትን ጡመ ሆጉተ አቶተ ጠረኝሽ ሸዘኖሰ።

መጻፉስ አፎሃ

ኣጉስ (1፡1-2)

መሲህ ፈንቀል አሜቶንከሰ እሀኖ ፍርደ (1፡3-12)

መሲህ ፈንቀል አሜቱሰ ኩለኖ ትምርት (2፡1-17)

አመዕነቲን ሀት ሄኤኖ ጎር ኩልታ ሸዘነተ (3፡1-15)

መጨረሻሰ (3፡16-18)

¹ ጳውሎስ፡ ሰላሰ፡ ጥማቶሰ አናኔ መገንለክ ቀርቼሃ መሲህ ኢሰረ እኮ ተሰሎንቄ ከተማን የንተ መገን አመዕናኖ ዱእ ምናተ ሶንኮምተ ሶህኑ።

² አና መገንቻለክ ቀርቼሃ መሲህ ኢሲቻ ኣሰቱትለክ ወገሬቱ ክዕኔሃ እሁን።

መሲህ አሜቶን እሀኖ ፍርደ

³ አመኤ ኦሶ! አመዕነቱክዕኔ ዋዕኔቻ በትሽ ነጻን አሜቶቤቹሃ መት-መቱክዕኔ ኢተቀንቴነንተ ኢተት በርግተን መርታቤቹሃ መገኑ ገለትጩ ሀሰሰኖቤቹሃ ክዕኔ መሳን መገኑ ጉዕመ ወክትንከ ገለትጭናም።

4 ኢልቶህዕኔ ኦርሸተለከ ሸረሙ አታዕሊን አመዕነቲንከክዕኔ ጠረኝቴን ኡርቴንተቤቺሃ ክዕኔተኔሃ መገን አመዕናኖ ጭምት ዱእ ምናን ጉዕማን ጠወኢሃ ሙልናምበኡ።

5 ኩ ጉዕሙንኩ ጠወ ለሊሰኖሁ መገን ፍርዱ ሀንቅ እሁሰለከ አዕኑ ኦርሸተ ቶጌንተሲሁ መገን ጄነትተኔሃ አበቀአኖህዕኔሃ እኮቤቺሃት።

6 መገኑ ሀንቅ ፍርደ ፈረደኖቤቺሃ ኦሪሸተ ኤባህዕኔሀኑኡ አሌን ፈንቀሽ ኦሪሸተ ኤበኖ።

7 ቀርቼ ኢሰ ሎረ ወልቀት ዮሰ መላይካን ሜጡበ ሰሜች ገረ ለበናን አሜተኖ ወክት ቴሱ ኦሪሸተ ቶጌነንተ ክዕኔሃ ኒንን ሜጡበ ፎሎጩ አሰኖህዕኔ።

8 መገኑ ደግበረለከ ቀርቼሃኔ ኢሰ ተሸት ላጋተ አዘዘንትበረ ገረ ለበናን ቀጠኢኖሰ።

9 እሰ ቀርቼ ብሬችለከ ኬዕምኝሰ ዋልቃች አደ እካን ዘላለሚሃ ቤሲን ቀጠኢኖሰ።

10 እሰ ህከ ወክት ኬዕምኝንከሰ ፈንቀለኖ ወክት ኬዕምኝለከ ገለት ጉዕማንከ ጠለላኖ ኡመቲችለከ አመዕንቶሀኑኡች ጉዕሚች ቶገኖ፤ አዕኑሁ እሲን ሜጡበ እኬነንተ፤ መሰንትሰ ምሰክርነቱኔ አመዕነቲን ቶጌንታኡ።

11 ካን ሰው ይነን ክዕኔተኔሃ ሙርኑዕነ ዱእ አዕናሚሁ መገኑኔ ገኤኔሀኒሃ በቀዕናምረ አኑህዕኔተ ጡመ አኢሃ ዮህዕኔ ሀሰሸተለከ አመዕነት ሆጉክዕኔ ጉዕመንከ ወልቃንተሰ አኑህዕኔታት።

12 ህትን ቀርቼኔ ኢሰ ሱዕሙ ክዕኔን ከበጀሞተለከ አዕኑሁ መገንኔለከ ቀርቼሃኔ መሲህ ኢሰ ኣሰቶን እሱን ከበጀንቶኖተ ዱእ አዕናም።

2

ሾክ መነ

1 አመኤ ኦሶ ቀርቼሃኔ መሲህ ኢሰ አሜትተኔሃለከ ነኡሁ እሲን ሜጡበ እንክ ጭምድናምቤቺሃ ዱእ አዕናሚሁ ህካኒት።

2 ራጊን ህከረንገ ላጋን ጠወአሞሀንገ ህከረንገ ኒች ሶህኑተ እክ ከተበሞሀንገ ኦቴን «ቀርቼ በሩ አሜቾኡ» ዪን ደዕልቴን ቀልብክዕኔ ሆርጥቶኖቼ፤ ጨነቀንቶኖቼ።

3 አዪሁ ሀከን አዲን ሉሲሱንከህዕኔ፤ መሰንትሰ ሄጭ ለግት አሜቱዕነ አዛብ ገረት በቀኣሰ፤ እሰን ኤተር ለገኣንቼ አሜቶተ ኢለ

ህከረንገ ሾኩ መንቹ እሰን በኦተ ዮኢሁ ለሎተ ኢሊ ሁኩ በሩ አሜተኖበኦ።

4 ሁኩ ሾኩ መንቹ ሸርክተ ዬን ሰገዴኖሰሁኦኡች ጉዕሚች አሌን ገውሰ ሎረ አኦኖ፤ ህትን «አን መገኘሃን» የንን መገን ጠሊሊ ምኔን ፈቁዕነ አፋዕሎተ መለላኖ።

5 ክዕኔን ሜጡበ ሄዕዮም ወክት ከ ጠወ ኩሎንክዕኔገ ሰውይቲነንተበእንዶ?

6 እሰን ወክቱሰ ኢልያን ለለኖሃ ኢሊ ቲሱ ለሉ ከመኖሲሁ መሃጎር እዕኑ ደጌነንተ።

7 መሰንትሰ ሂሊ ሆጉተ ማጥ አታኢት፤ ሁኩንን ቲሱ ከሚሃ ዮ ሂሊ ምስጥር ዋልቀት ቲሱ ሆጎ አሌኒት፤ ሁኩንን አህሮሁ ዋቄች ሸቆተ ኢላት።

8 ህከኒች ኤተሮን ሁኩ ሂሊ መንቹ ለለኖ፤ እሱንከ ቀርቹ ኢሰ አፌችሰ ፋላኖ ፎገሊንለክ አሜትሰ ኬዕምኚን ሸኖ።

9 ሁኩ ሂሊ መንቹ አሜተኖሁ ሻይጣን ዋልቃን ሉሲሰኖ አጀብሲሰኖ ጠወለክ መላተ ገረምሲጩኖርቹ ጉዕመንከ አኢኒት።

10 ህትን በኦ መነ ጣንሰታኢሁ እኮሰ ሂሊርቹ አኢኒት፤ ሁኩ መኑ በኦኢሁ ጡምቶተ አበቀአኖሰ ሀንቅ ኢተተ ቶጉ ግባቤቺሃት።

11 ህካን እኮቤቺሃ ክዝቢን አመዕንቶተ መገኑ ሎረ ሉሲሳ ወልቀተ ሶሀኖሰ።

12 ሁኩን አህሮሁ ሀንቂን አመዕኑ ግብ ጩብ አሌን ሙንደኦህኦኡ አሌን ፈረደምታት።

ጡሚሃ ደዕሬስ መነ

13 ቀርቹን ኢተንቲንተ አመኤ ኦሶ! እኮጎሬ ነኤ ክዕኔ መሳን መገኑ ጉዕመ ወክት ገለት ኦሶ ሀሰሰኖኔ፤ ገለት ኦሰኖሚሁ ክዕኔተ ጠሊሊ አያኒን ጠሊልቲንተቤቺሃ ሀንቅ አመዕኖንከክዕኔ ጡምቶኖተ መገኑ ሄጭ ደዕሬሀዕኔቤቺሃት።

14 ነኤ ኩልኖንክዕኔ ተሸት ላገ አዲን ቀርቹሃን መሲህ ኢሰ ኬዕምኝ ደአቶኖተ መገኑ ገኤሀዕኔሁ ከኒሃት።

15 አመኤ ኦሶ! ህካን እኮቤቺሃ ቲሱ ጠረኝቲን ኡርዬ፤ አፌችኔ ፋልቶ ላጋን ህከረንገ ሶህኖን ተማርሰኖንክዕኔ ሀንቅ ትምርት ሀሰኖቹ።

16 ቀርቹኔ መሲህ ኢሰ ገውሰለክ መገኑ አኦኔ ኢቲኔሁ ኦሰቶንከሰ ዘላለሚሃ እካ ጠረኝመተለክ ጡመ ተብሳሃ ኦሴኔ

17 ጡመ እኮ ጠወ ጉዕመንከ አቶኖተለከ ጠወኣኖተ ቀልብክዕኔ ሰበርሶህዕኔ፤ ጡመ ጠወ ጉዕመንከ አቶኖተለከ ጠወኣኖተ ጠረኝሶህዕኔ።

3

ዱኣ እኡ ጉዕመርቺንከ ጡመ እሁሰ

1 አመኤ ኦሶ! ክዕኔቤችን እኮህንገን ቀርቻ ላገት ደዕልት አልባዕልቶተለከ ኬዕምኚን ቶገሙ ደእቶተ ኒተኔሃ ዱኣ አዕዬ።

2 ህትን መናን ጉዕማንን አመዕነቱ ሄእበቤቺሃ ሾከለከ ሂለ መኒቻ ጡምኖተ ዱኣ አዕዬ።

3 ጠዉ እኮጎሬ ጠረኝሰኖህዕኔለከ ሸይጣኒቻ አገረኖህዕኔ ቀርቼ አመዕነሞእሃን።

4 አዘንዛንክዕኔ ጠወ ቴሁ እኮ ከ ኤተሩ አቴነንተገ ቀርቺን አመዕንናንክዕኔ።

5 ቀርቼ ቀልብክዕኔ መገን ኢተተ ደጎኖተለከ መሲህ አታዕሉ ደጎኖተ አዎንሱንክዕኔ።

ሆጉተ እኡ ሀሰሰኖሃ እሁሰ

6 አመኤ ኦሶ! ኒቻ ተማርቲንተ ትምርቲን እሁዕነ ሆጉተ ኢትበ አመዕናንቺቻ አዬቺሁ አደ እኮኖተ ቀርቼሃ መሲህ ኢሰ ሱዕሚን አዘንዛንክዕኔ።

7 ነኡ ክዕኔቤችን ሄዕኖም ወክት ዋንክዕላመተ እሁ ሆጉኔ አዕኑሁ ደገኒንተቤቺሃ ኔሳሃ አጉዳን ሄኡ ሀሰሰኖህዕኔገ ደገኒንተ።

8 አዬ አሌኒ እጅነተ እንካምበእገ ሀንከዕርተለከ በራሃ አጸመን ሆጉተ አዕነን ሄዕኖም ቤሉ አዬቺ ጣብተ ጠለዕለ እንቶምበኡ።

9 ሁኩንን አዕኑ ኒ ሞሳልተ አዎንቶኖተ ይኒት ቤሉ ሁኩን ኔሳሃ ሀዕለንሸ ደእኖተ መብትት ሄኡዕናኔ ፈንቅትበኡ።

10 መሰንትሰ ነኡ ክዕኔቤችን ዮም ወክት «ሆጉተ አሲሃ ኢትቡ መንቹ እቱንከ» ይን ከ ትዛዝ አሰኖንክዕኔ እቅ።

11 መሰንትሰ መት-መቼ ሆጉተ አሲሃ ኢትቡ መኑ በላንከክዕኔ ሄኡሰ ሞጮጭኖም፤ እሰን ኣግሰበሰ ጠዋን ኣገን መቼቺሃ አቱዕነ ሄኣእራን።

12 ህትኔ መነ ረጀይት ሆጉተ አተን ገይሰ እቸተ እቶተ ቀርቼሃኔ መሲህ ኢሰ ሱዕሚን አዘንዛንሰ፤ ሸንዛንሰ።

13 አመኤ ኦሶ! አዕኑ እኮጎሬ ጡመ ሆጉተ አቶኖተ «ቆንዶኖም» ይቶኖቼ።

14 ተን ዳብዳቤን ክዕኔኤሃ ኩልኖም ሸዘነተ ሞጮጮቡ መንቹ ሄዕዮ ጎሬ ህትናሙ መንቹ አጥራመቱን ደጌ፤ እሰን ሙሎተ እሲን ደቀንቶኖቹ።

15 ጠው እኮጎሬ አመቤትገ ኡሙዕርዬሰ ቤሉ ዲንገ አቴን ለኦኖቼሰ።

መጨረሻ ወገሬት

16 ወገሬት ቀርቹ ገውንኩሰ ጉዕመ ወክት ጉዕመ ጠዋንን ወገሬት ኣሱንክዕኔ፤ ቀርቹ ጉዕሚንከክዕኔ ሚጡበ እሁን።

17 ከ ወገሬት ገይኤ አንጋን ከተቦንክዕኔሁ ኣኔት ጳዉሎሴት፤ አን ሶኮም ዳብዳቤን ጉዕሚንን ደገንታ መላት ተኒት፤ ከተባሚንኩ ህትጎታን።

18 ቀርቹሃኔ መሲህ ኢሰ ኣሰቱት ክዕኔን ጉዕሚንከክዕኔ ሚጡበ እኩን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d